

Ekukwo-Ozi  
**Jemisi**  
**De**

<sup>1</sup> Mmē wụ Jemisi de ẹhụhụọ-ozini. M wụ igbọn Osolobue lẹ Di-nwōnni-ẹnyi wụ Jesu Kristi. M rị e dejenni ndi ikpun-ulo mmēbuo alị Izrelu, hụn risonmē alị ndi ozo rị ichen-ichen ya; e kele m ọnu!

*Afunfun, Okukwe Lẹ Amamihien*

<sup>2</sup> Umunē m, oge ọwule udi onwunwan rị ichen-ichen gi a biani unu, weri n'ẹ ni ihien unu e gi ghoghọ ro—  
<sup>3</sup> makeni unu a maringho ni wẹ lele okukwe unu, o weheni unu ndidi. <sup>4</sup> Ni ni nwan ndidi runchanrin orun a, keni unu hun uzo wuru ndi ka ehụ, zu oke, nwonleni ebe wẹ no a la azun.

<sup>5</sup> Onye ọwule rị ime unu hun marinleni ihien o k'e mē, ya mē ekpere rị Osolobue hun a shiapu ẹfo e ye ihien— o k'e ye ẹ amamihien. <sup>6</sup> Kani, ya gikwo okukwe rị; y'e gikwole obi ẹbuo, kaka. Makeni, onye obi-ẹbuo nohu ke ebiri-mirin ohimin hun ufere rị e nu, e nuhunmē. <sup>7</sup> Onye no erira y'e rokwole n'o k'e nwonhen ihien ọwule ẹka Di-nwōnni-ẹnyi, <sup>8</sup> makeni onye obi-ẹbuo k'ọ wu; ime ihien ile o mē, a ra sa ẹka kwademe obi ẹ, mē ihien ọwule.

*Egbeyele Ni Onye Ọwule*

<sup>9</sup> Onye ọwule kwerini bu o wu ogbenneye, ya ghoghoma ni Osolobue e bushiguo a elu; <sup>10</sup> hun wu odafin ya ghoghoma ni e wetuguo w'a anị. Makeni, ndi-idafin jenko d'a ghafe ke obobo ofia: <sup>11</sup> anwun wahu, ẹfifia rị ofia e shinwun, obobo ẹ a danfu, mma a agu! Erira k'ọ rizi ni ndi-idafin, wẹ k'e shinwun ebe wẹ rị e bi elu wẹ.

### Ọnwunwan

<sup>12</sup> Onye ọwụlẹ gi ndidi sọn ọnwunwan k'a narin ngozi, makeni, o fuha ọhunma, Osolobue e gi ndun ahun o kwe ndi ihien e a sọ nkwa a tu onye ahun ugón mmeri.

<sup>13</sup> Ọnwunwan bia ni ihian, y'a sikhwole, "Osolobue ri a nwan m." Makeni, eje-ihien ara gun Osolobue egun omume; ya le enwen e ara nwanzikwo ihian. <sup>14</sup> Ni ọnwunwan biani ihian wu ni eje-ihien la a enya, gunma a. <sup>15</sup> Ihien olila-enya kwonkenmeguu ihian, o mupuha njo; njo karaguu, o mu onwun.

<sup>16</sup> Umune m, anikwole ni we dufie onu. <sup>17</sup> Makeni, ihien ile we shiapu-efo ye le ihien owule zu oke we e ye eye gha elu-igwee, aka Osolobue, bia. Osolobue wu Nedi hun e ye ukpe ile rini hun ghaleni e bi ekanai—a ra gbehuto, ara yebe ukpe, yeme ishi. <sup>18</sup> Iya kwademe obi e, shiapu efo mudonzi enyi, ghahani oku e hun wu ezioku, keni enyi wurun'a mkpuru-ibuzo o gha ime ihien ile o ke ghoru.

### Inu Oku-Chuku Le Igi E Bi

<sup>19</sup> Umune m ri m obi, marin ni onwan: onye owule ya a nukpo oku; y'e kukenrinle oku; y'e bukenrinle olulu—  
<sup>20</sup> makeni olulu ihian ara runpuha ihien Osolobue cho. <sup>21</sup> Wepu ni nwan ihien ile ru unyin le eje-ihien ile unu ri e gi e mekaru enwen onu; onu e welua enwen unu ali, nabanhan oku Osolobue we kunye ime obi unu, hun k'a s'eka zuopuha ume-ndun unu. <sup>22</sup> Kani, e gikwo ni ya wu oku Osolobue e bi; awukwole ni ndi a nu onunu sọ, hun ri e dufie enwen we. <sup>23</sup> Makeni, onye owule hun a nu oku-Chuku bu ara gi e bi nohu ke onye gihu ughegbe lee enwen e. <sup>24</sup> Eghẹ. Makeni, o leghahu enwen e, gha ebegu pu, o zo ke o no ozigbo. <sup>25</sup> Kani, nke ndi hun e leban enya iwu hu zu oke wu oku Osolobue, hun e me ihian e nwonrin enwen e, omeni w'e dikenme, mesonme ihien o cho—ni

emēni wẹ ndi a nu, a zo ihien wẹ nu, kanj ndi e gi ẹ e bi, Osolobue k'a gozi wẹ make ni wẹ ri e gi ẹ e bi.

<sup>26</sup> Onye hun si n'ọ ri e fe Osolobue bu ara kwondon ire ẹ, ri e dufie enwen ẹ; ofufe ẹ wu ihien-eti. <sup>27</sup> Ezigbo ofufe zu oke, ruleni aru enya Osolobue Nedi enyi wu hunni: ilepu ndi nwonleni nne mobu nedi le ndi di wẹ nwun enya ebe wẹ ri a ta afunfun—lezi idonme enwen ihian make uwa gha e meru a.

## Isi Nke Ebuo

### *Egbeyeleni Ihian*

<sup>1</sup> Umune m, ebe o me nwan ni unu kweri ni Di-nwonni-enyi wu Jesu Kristi, Di-nwonni-enyi nwe ogho, ni unu wuruzi ndi e gbeyeni ihian?

<sup>2</sup> Omēni onye yi ekwa-oma nanranni, yisonme ola-eka goru, a banhan ebe onu ri e zu, ni ogbenye yi ekwa rileni mma kaka a banhanzikwo ebenu, <sup>3</sup> onu a gbaye hun ken ekiken ri mma, si a, “Dodo, nodi ali ocheni ri mma,” si hun ogbenye, “Wuzo ebenu,” mobu “Nodi ebeni uku m ri”—<sup>4</sup> ohun a ghosiguoni ni unu e gbeyeni ihian ime igunrun unu, ni unu e gi obi zinrinleni e me ihien unu? <sup>5</sup> Umune m ri m obi, gon ni ntin! Osolobue a horiguoni ndi-igbenye? Eghee, o horiguoni ndi-igbenye ime uwan ni wẹ wuru ndi-idafin ime okukwe, wuruzikwo ndi k'a banye Ali-eze hu o kwe ndi nwe ihien-osusu a nkwa. <sup>6</sup> Kani, unu e legberi ndi-igbenye! Ele ndi-idafin a kpangbu unu? Ele wẹ a dojen unu ogwa? <sup>7</sup> Ele wẹ e kutọ efan Onye hu richanrin mma hun unu ri a za?

<sup>8</sup> Omēni unu e donme iwu hu Eze ye ke wẹ don de ẹ ime Ekukwo-nso, iwu hu hun si, “Ihien ibe i ya suo i ke i ihien i don a suo i”—unu e meguo ihien ri mma. <sup>9</sup> Kani, omēni unu e gbeyeni ihian, unu ri e me njo, ikpe a maole unu make ni unu ri a dan iwu. <sup>10</sup> Make ni, onye donmechanrin

iwu ile—dan ohu, ikpe a maol'a nọkẹ onyẹ danchanrịn iwu ile. <sup>11</sup> Makeni, Osolobue ohu hụ hụn si, “Agherele,” iya sịzikwo, “Egbule ochu.” Ya wu, omeni y'e gbu ihian, y'a danchanringuo iwu hụ ile—osun'a ni y'a ghereni.

<sup>12</sup> Ya wu, ke iku-oku ke omume, e mechanrịn ni we ke ndi we k'e gi iwu hụ e me ihian e nwonrin enwen e kin ikpe. <sup>13</sup> Makeni, onyẹ owule meleni ebere, we jenkonị d'e kin e ikpe, emekoni w'a ebere. Ebere y'e meri ikpe-omuma.

### *Okukwe Le Orun*

<sup>14</sup> Umune, elee erere k'ọ ban n'i si ni i nwon okukwe, omeni y'e gin'e run orun? Ni okukwe ahun saeka zuopuha i? <sup>15</sup> Omeni ekwa ezuni onyẹ nke Kraisti ibe unu ukun mobu ni ihien o k'e ri uhuhin hụ a ri a, <sup>16</sup> onyẹ ohu ime unu a si a, “Ijen ewere-o! Oyi atukwole-i-o! Rijunkwo ef-o!”—kani, y'e yen'e ihien ehụ a cho. Elee erere k'ọ ban?

<sup>17</sup> Ya wu, okukwe nodini bu egini w'e run orun a nwunhuguo.

<sup>18</sup> Kani, ihian k'a si, “Onyẹ le nke e ro: nke i wu okukwe, nke m wu orun.”

Aziza m wu, “Ghosidele m ke onyẹ owule e gi saeka nwon okukwe nke-esi bu orun ari a. Mmẹ nwen, m jenko d'e gi orun m ghosi i okukwe m.”

<sup>19</sup> Y'e nwongho okukwe nu—hun i gi kweri ni Osolobue ohu suo ri, ele iya? Y'e meke-o! Kani, eje-mmọn kwerizikwo ekweri!—ya ke egun gi a tu we, ehụ hụ a ma we nni!

<sup>20</sup> Onyẹ-nzuzu! I cho ni we ghosi i ni okukwe nodini bu y'e gin'e run orun a nwunhuguo? <sup>21</sup> Ele ihien nedi enyi wu Ebrahim run ke Osolobue gi kun'e ohunma—ogen hụ o gi wehe nwa a wu Aziki, n'o gi e chu-ejan elu ukpo nchu-ejan hụ? <sup>22</sup> Y'a hun a? Okukwe e le orun a rungbama; ihien o me ke okukwe e gi zu oke. <sup>23</sup> Erira ke

ihien hu Ehuhuo-nsọ ku don mezu, ni, “Ebrahim kweye ni Osolobue, Osolobue no gun a yen'e, kpọ a onye ri ke Chuku cho, kpọ a owu a.”

<sup>24</sup> Y'a hun a nwan ni ihien onye run ke Osolobue gi e kun'e ohunma—ele okukwe suo!

<sup>25</sup> Ele erira ke Osolobue gizi gi ihien igbaraja hu wu Rehabu me kun'e ohunma—ogen hu o gi nabanhan ndi hun Joshua zi d'e gi nzuzue lele ali Jeriko, zueme we, yeni we aka ghashi uzo ozo wanahin? <sup>26</sup> Ya wu, k'o don me ni ehụ ihian mmon rileni a nwunguo, erira k'o donzi me ni okukwe orun rileni a nwunguo.

## Isi Nke Eto

### Izun Ire

<sup>1</sup> Umune m, emele ni ndi-nkuzi, ndi-nkuzi, makeni onu a maringho ni aka we k'e gi kin enyi ndi-nkuzi ikpe k'a ka e ze. <sup>2</sup> O runahinsonme enyi ile arunahin. Onye owule oku-onu ghalen arunahin e zugu oke, o k'a sazikwo aka kwondonchanrin ehụ a ile.

<sup>3</sup> Enyi kenme eshin onu keni o hume ni enyi isi, enyi k'a saaka ki ehụ a ile. <sup>4</sup> Lezide ugbo-mirin: osuon'a ni e hika we ogbe, osuon'a ni oken ufere suo nwon e bu we—sterin mehu ekere ke onye a nyan n'a gi a fi a e shi ebe owule o cho. <sup>5</sup> Erira ke ire rizikwo—mkpamkpa-ehụ me ntin ro, kani o kukari enwen e!

Lezide nwan ke okun me ekere a dunfu egboko! <sup>6</sup> Ire wu okun nke-esi. Ire nohu ke ebe we no bu njo han ke uwa ile che enyi ehụ! O rucharin ehụ ile unyin! O bu ndun i ile e che ime okun! Okun ire gi a dun gha okun-mmon a bia.

<sup>7</sup> O nwonni udi anu owule hun a kpa anj, hun a ri arj, hun ri ime ohimin mobu nnunu hun ihian keleni zun mobu hun o me ni ihian asako aka zun a. <sup>8</sup> Kani, o nwonni onye owule wu ihian hun k'a sa aka zun ire. Eje-ihien

ghaleni e zu iken k'ọ wu. Eje-nshi hun e gbu ihian ya jun ime e. <sup>9</sup> Ya ke enyi gi a ja Onye-nwonni-enyi le Nedi enyi mma; iya ke enyi gizikwo a bu ihian we ke udi Osolobue onu! <sup>10</sup> Onu ohu hu ojija-mma gha a puha ke ibu-onu ghazi a puha! Umune m, o furuni n'ọ ri enina. <sup>11</sup> Ni isi-mirin ohu gha onu ohu a gbapuha mirin ri mma hun a suo usuo le hun e lu ilu? <sup>12</sup> Umune m, ni osisi figi mi mkpuru olivu? Ni osisi grepu mi mkpuru figi? Mba! Ya wu ni mirin hun a suo nnu-nnu a s'eka wefuha hun a suo ohunma.

### *Amamihi*en Nke Osolobue Le Nke Ekwensu

<sup>13</sup> Onye marin ihien nke-esi ime igunrun onu? Onye nwe nghota? Ya gi obibi ri mma o ri e bi le k'o don e welua enwen e ali ghosi ni ihien o ri e me gha ezigbo amamihi en a bia. <sup>14</sup> Kanj, omeni eje enya-ufu le icho nke-i nke-i ri i obi, ezuemekwole ezioku rin'a, a nyan isi ni y'a maringwo ihien, makeni ntụ k'i ri a tu.

<sup>15</sup> Elekwọ enu-igwee ke udi amamihi en hu gha bia! Nke uwa ro; nke ihian-mmaka ro, eka Mmon-nso aria; nke Ekwensu ro. <sup>16</sup> Makeni ebe owule enya-ufu le icho nke-i nke-i ri, ebenu ke we no a hunzi isusu le udi eje-ihien ile ri ichen-ichen.

<sup>17</sup> Kanj, nke amamihi en ahun gha elu-igwee bia—nke ibuzo wu ni o nwonni kaka eje-ihien owule rin'a; udon k'ọ cho, a ra me iken-iken; o lee k'ọ ri ndi ozo; ebere le mkpuru ri mma jun ime e; a ra gbeye ni ihian; ihunna ari a. <sup>18</sup> Ndi-udon marin ke we don e gi udon a kun mkpuru, o mipuha ezi-omume.

## Isi Nke Ẹno

### *Awule Owu Uwa*

<sup>1</sup> Elebe ke ikpe risonme ime igunrun unu gha a bia? Elebe ke ogun risonme ime igunrun onu gha a bia? Ele

ihien ndi ahun a gungbuni unu ri ime unu a lu agha? <sup>2</sup> Unu cho ihien ni unu enwɔnhenni ihien unu cho, unu e gbume ọchu. Ihien na unu ẹnya, ni unu asani ẹka nwehen e unu e kpeme ikpe, luma ogun.

Unu enwon makeni unu ara rijo. <sup>3</sup> Unu rijo unu ara nwonhen—makeni ihien unu bu obi ari mma: unu ri a rijo hun unu e gi me ihien a sọo ni unu. <sup>4</sup> Ndi obi we rileni ọzo ohu! Unu amarin ni iwu ọwu ọwa wu iwu enenren Osolobue? Ya wu, onye cho n'ọ wuru ọwu ọwa o henrin enenren Osolobue. <sup>5</sup> Ra unu ri e ro ni Ẹkukwo-nsọ enwon ihien o ri e ku oge o gi si ni “Enya a fu Mmon hun Osolobue we che ime ẹnyi ọfu omeni ẹnya ẹnyi ri ọzo-ẹbuo?”

<sup>6</sup> Kani Osolobue e yecheni ẹka, e yecheni iken; ya hain Ẹhuhuo-nsọ gi si, “Osolobue a nokin onye-mpache ọzo, kani, o yeni onye e welua enwen e ali ẹka.” <sup>7</sup> Ya wu, bu ni nwan enwen unu che okpuru Osolobue. Che ni Ekwensu ogun, o k'a gbanj unu oso. <sup>8</sup> Nokunme ni Osolobue keni Osolobue nokunme unu. Kwopu ni ẹka unu, ndi njọ! Chanchanpu ni obi unu, ndi obi-ẹbuo! <sup>9</sup> Goo ni! Kwan ni! Enya-mirin ya gba unu! Emu unu ya henrin ẹkwan, unu a na ighoghọ unu to, sukuru!

<sup>10</sup> Wenya ni enwen unu ali ebe Di-nwonni-ẹnyi ri keni o bushi unu enu.

### *Ekutole Ni Ibe Unu*

<sup>11</sup> Umune m, ekujakwole ni oku onye Itu-Kraisti ibe unu, makeni onye owule kuja oku onye Itu-Kraisti ibe e mobu kin e ikpe ri e kutọ Iwu Osolobue ye, e kin Iwu Osolobue ikpe. I gha e kin Iwu ikpe, y'elezi onye e donme Iwu—y'a wuruguo oka-ikpe! <sup>12</sup> Onye ohu sọo ri hun e ye Iwu, onye ohu hu wuzikwo Oka-ikpe; iya a sa ẹka a zuopuha, iya a sazikwo ẹka e tikpo. Onye k'i wu nwan i gi e kin onye Itu-Kraisti ibe i ikpe?

*Kpachanfu Ni Ẹnya Banyeni Inyan-isi*

<sup>13</sup> Lee ni ẹnya, unu ndi hun a si, “Tanni mobu ekile, ẹnyi k'e jen alini mobu ani-nei; ẹnyi k'a no ahua ebefu—zun afia, kpa egbo”— <sup>14</sup> bu unu amarin ihien eki k'a mu! Ki wu ndun i? O nohu ke igirigi hun a puha, o nohu ekere, o fopu! <sup>15</sup> Ihien furu unu k'e ku wu, “Omẹni uche Dinwonni-ẹnyi ro, ẹnyi k'a ri ndun, me ihienni mobu ihien-nei.” <sup>16</sup> Kani, hun nke unu e gi e ku erira, unu hu a pache, a nyan isi. Udi inyan-isi ile no enina wu njo.

<sup>17</sup> Ya wu nwan ni onye owule marin ihien furu o k'e me bu o men'e, e meole njo.

**Isi Nke Isen***Ndi-idafin, Kpachanfu Ni Ẹnya!*

<sup>1</sup> Unu ndi-idafin, gon ni ntin: kwanmakwo ni ekwan; e gokwo ni—make nsongbu hun lala ni ni onu!

<sup>2</sup> Aku-le-uba onu e wiwigo! Ekika e ripuguo ekwa unu!

<sup>3</sup> Goru unu le ola onu a gbaguo nchara! Ncharani we gba k'a shiagbu unu eri; o jenkọ d'e ripu uru ri unu ehụ ke okun don e ri ihien. Unu a kpatoguo aku-le-uba ime uwani rugu njendeme. <sup>4</sup> Gon ni ntin! Egbo-orun ndi sun ni unu ofia, hun onu gi mmegbu ju ni onu akuko ugwo ri nwan a kwan! Ekwan ndi ghoni unu ihien-ugbo e ruguozị Nna nwon iken ile ntin! <sup>5</sup> Unu e biguo obibi ehụ-ufu le iri-owa elu uwani. Unu a zunguo akp'obi unu toni uhuhin ogbugbu. <sup>6</sup> Unu a maguo ndi nwonleni ihien we me ikpe, gbu we—bu o nwonni ihien we ju unu!

*Din Ndidi*

<sup>7</sup> Umune m, e nwon ni nwan ndidi d'e ru ni Di-nwonni-ẹnyi a bia. Lee ni ke onye-ugbo e che mkpuru ihien o kunye ali hun rikeme e mkpa, e din ndidi ni mirin ibuzo le mirin ikpazuun zueyegu a ohunma-ohunma. <sup>8</sup> Unu



nwen k'e nwonzikwo ndidi erira, kwonkenme obi unu—makeni obibia Di-nwonni-enyi a riguo nsue.

<sup>9</sup> Umune m, edenwinwinkwoleni ni ibe onu, make Osolobue gha a ma onu ikpe—makeni Oka-ikpe e ruguo onumuzo, o d'a banhan! <sup>10</sup> Umune m, leri ni agungun ndi-amuma hun gi efan Di-nwonni-enyi ku oku ogen mbu, keni unu gi e marin ke unu a don dingbu afunfun. <sup>11</sup> Ezie, enyi a ja ndi din ndidi mma. Unu a nughu ke Jobu don din ndidi; unu a hunghozi udi obi Di-nwonni-enyi nwe, ni Di-nwonni-enyi e meke onye-efoma le onye-ebere.

### *Ekunle Iyi*

*(Mat 5.33-37)*

<sup>12</sup> Hun ka mkpa umune m, ekunle ni ihien owule, kaka! Ke elu-igwee ke enu-uwa ke ihien ozo owule—ekunle ni hun owule. Kama, omeni eghee ro, si ni hu “eghee;” omeni mba ro, si ni hu “mba” amangbe ikpe-omuma a rini unu.

### *Ekpere*

<sup>13</sup> O nwe onye nwe nsongbu ime unu? Ya me ekpere. O nwegho onye ri a ghoghoni? Ya bu ebu ija-mma. <sup>14</sup> O nwe onye emu ri a ku ime unu? Ya kpọ ndi-isi uka ni we men'e ekpere, gi efan Di-nwonni-enyi hu uden kpu e. <sup>15</sup> Ekpere we gi okukwe me k'a zuo onye emu hu, Di-nwonni-enyi e weli e; omeni onye hu me njo, o gbaghari a ya.

<sup>16</sup> A gwa ni nwan ibe onu njo onu me, e meni ni ibe unu ekpere—keni unu hun uzo dnhin. Ekpere onye ri e bi ke Chuku cho gi akpali obi e me nwon iken, o runkenme orun.

<sup>17</sup> Elaija wu ihian hun no ke enyi. Kani, osun'a n'o wu ihian, ogen o gi mekenme ekpere amangbe mirin gha e zue—mirin ezueni orogbo ahua eto le ifon isin, ali ahunni

mirin! <sup>18</sup>Ọ nọ mezi ekpere, elu-igwere nọ ye mirin, alị nọ mị mkpuru a.

<sup>19</sup>Umune m, omeni o nwon onye owule ime unu gha ime ezioku kpahu, ni onye ozo e wekinhen e azuun; <sup>20</sup>hun wekinhen e azuun ya marin ni onye hu wekinhen onye-njo ri e huni azuun k'a zuopuha ume-ndun onye njo hu aka onwun, kpume njo bu oda.

**Elu Ọhụn: Èkùkwọ-Nsọ (Azụụn Ọhụn rịn'a)**  
**Revision of New Testament in Ika**

copyright © 2010 Wycliffe

Language: Ika

Translation by: Wycliffe

Ika (ikk) Nigeria

In Nigeria the word Ika is not only the name of the Ika people, but is also used to designate a local government area in the Akwa Ibom State. The Ika people are a sub group of the Igbo people. It is interesting to note that Ika is the name of a town in Croatia is one of the eight Annang local government areas of the local government areas in Akwa Ibom State. An alternative name for the Ika people is Ika-Annang. There appears to be another dialect of Ika that is spoken in Delta State of Nigeria.

**Copyright Information**

© 2010, Wycliffe. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789037056

Revision

**The New Testament**

in Ika

© 2010, Wycliffe. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 19 Oct 2021 from source files dated 19 Oct 2021

31b0248e-272a-5dee-8226-bcc00c54d9b1